

Na osnovu člana 14. Zakona o mladima Federacije Bosne i Hercegovine ("Službene novine Federacije BiH", broj 36/10) i člana 25. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad Sarajevo na sjednici održanoj dana 30.08.2013. godine, donijelo je

ODLUKU

O FORMIRANJU KANCELARIJE ZA MLADE OPĆINE STARI GRAD SARAJEVO

I - OPĆE ODREDBE

Član 1.

Ovom Odlukom uređuje se način osnivanja i funkcionisanja "Kancelarije za mlade" u Općini Stari Grad Sarajevo, kao i ciljevi njenog rada i djelovanja.

Član 2.

Općina Stari Grad Sarajevo kroz osnivanje Kancelarije za mlade povjerava Vijeću mladih Općine Stari Grad Sarajevo obavljanje sljedećih aktivnosti:

- Informisanje mladih o pitanjima značajnim za mlade: obrazovanje, zapošljavanje, mogućnosti za aktivno i kvalitetno provođenje slobodnog vremena, bavljenje sportom, njegovanje zdravih i bezbjednih stilova života, omladinskim razmjenama, održivom razvoju i drugim oblastima u skladu sa Strategijom za mlade Općine Stari Grad Sarajevo (2012 - 2017. godina);
- Sprovođenje omladinskih i volonterskih aktivnosti u skladu sa zakonom o volontiranju u Federaciji BiH ("Službene novine Federacije BiH", broj 110/12);
- Obrazovanje obuka, seminara i različitih manifestacija;
- Obezbjedenje prikladnog prostora za mlade, rad s mladima i omladinske aktivnosti, a u skladu sa objektivnim mogućnostima Općine i odredbama Odluke o dodjeli u zakup poslovnih zgrada i poslovnih prostorija Općine Stari Grad Sarajevo;
- Pruža materijalnu i druge vidove pomoći, u skladu sa svojim mogućnostima, i to kroz sredstva predviđena u Budžetu Općine za potrebe rada i funkcionisanja Vijeća mladih Općine;
- Komunicira sa mladima i podstiče njihovo učešće u donošenju odluka;
- Uspostavlja saradnju sa svim relevantnim partnerima i radi na njihovom umrežavanju u cilju zadovoljenja potreba mladih;
- Učestvuje u izradi i sprovođenju Lokalnih akcionih planova za mlade.

Član 3.

Kancelarija za mlade je servis mladih građana sa područja Općine Stari Grad Sarajevo.

Član 4.

Kancelarija za mlade je namijenjena svim mladima bez obzira na pol, rasu, nacionalnu pripadnost, vjersko ubjeđenje, jezik, društveno porijeklo, imovinsko stanje, članstvo u političkim, sindikalnim ili drugim organizacijama, psihički ili fizički invaliditet, fizički izgled i druga stvarna odnosno pretpostavljena lična svojstva.

Član 5.

Ciljevi osnivanja kancelarije za mlade:

- provođenje odredbi Zakona o mladima FBiH i Strategije za mlade Općine Stari Grad Sarajevo
- povećanje aktivizma
- sticanje iskustava i znanja putem neformalnog obrazovanja
- veća i bolja informiranost
- poboljšanje kvaliteta života kroz volontiranje i učestvovanja u različitim programima
- povećanje mobilnosti kroz učešće u međunarodnim programima i razmjenama

- veća vidljivost mladih
- sticanje radnog iskustva i staža mladih osoba

II - PRAVA I OBAVEZE OPĆINE STARI GRAD SARAJEVO

Član 6.

Općina Stari Grad Sarajevo će u skladu sa svojim objektivnim mogućnostima i u skladu sa odredbama Odluke o dodjeli u zakup poslovnih zgrada i poslovnih prostora Općine Stari Grad Sarajevo, osigurati prikladan prostor za mlade, rad s mladima i omladinske aktivnosti, kao i osigurati podmirenje troškova njegovog održavanja.

Član 7.

Općina Stari Grad Sarajevo će u svom Budžetu obezbijediti grant za finansiranje Kancelarije za mlade.

Član 8.

Državni službenik za pitanja mladih, u saradnji sa drugim općinskim službama, u slučaju iskazane objektivne potrebe pružit će neophodnu stručnu pomoć u radu Kancelarije za mlade.

III - PRAVA I OBAVEZE VIJEĆA MLADIH OPĆINE STARI GRAD SARAJEVO

Član 9.

Vijeće mladih Općine Stari Grad Sarajevo će voditi Kancelariju za mlade u skladu sa zakonom, ovom Odlukom i drugim podzakonskim aktima.

Član 10.

Vijeće mladih će u roku od 60 dana od dana stupanja na snagu ove Odluke donijeti Poslovnik o radu Kancelarije za mlade i isti dostaviti Općini Stari Grad, odnosno, općinskom načelniku i Općinskom vijeću Stari Grad radi upoznavanja sa odredbama istog.

Član 11.

Odgovorna osoba ispred vijeća mladih Stari Grad Sarajevo za rad Kancelarije za mlade je ovlaštena osoba udruženja evidentirana u Ministarstvu pravde Kantona Sarajevo.

Član 12.

Vijeće mladih se obavezuje da će obavljati poslove navedene u članu 2. ove Odluke kao i ispuniti ciljeve Kancelarije za mlade navedene u članu 5. ove Odluke.

Član 13.

Vijeće mladih će podnositi redovne godišnje izvještaje o radu Kancelarije za mlade Općinskom vijeću Stari Grad na razmatranje i usvajanje.

Član 14.

Vijeće mladih će podnositi redovne godišnje finansijske izvještaje o radu Kancelarije za mlade i utrošku odobrenih finansijskih sredstava Općinskom načelniku i nadležnoj Općinskoj službi za finansije.

IV - NADZOR NAD PRIMJENOM ODLUKE

Član 15.

Nadzor i kontrolu nad radom Kancelarije za mlade vršit će nadležna općinska služba koju naknadno odredi Općinski načelnik posebnim Zaključkom ispred organa uprave kao i Komisija za mlade Općinskog vijeća Stari Grad ispred Općinskog vijeća.

V - ZAVRŠNA ODREDBA

Član 16.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 02-49-366/13
August 2013. godine
Sarajevo

Predsjedavajući
Općinskog vijeća
Stari Grad Sarajevo
Vedran Dodik, s. r.